

古碣逢人留盛記。行旌到處誦元戎。將星好向文星認。筆劍光芒耀碧空。
新詩讀罷興偏長。異國同文字句香。數萬甲兵胸次蓄。三千世界地球藏。
蓬瀛自古稱仙境。榆塞欣今息戰場。單驕西征君志壯。春風遠送返扶桑。

謹步同遊伊犁河原韻錄祈大吟壇斧政。李 溶

青郊聯轡擬仙遊。四面雲山無盡頭。鈎得鮮鯉談化境。問誰砥柱作中流。

南州少佐來遊伊犁。將有南疆之行。勉成俚句。藉紀離悰。即

以贈別。尚希吟政。湘鄉炯吾氏曾一鶚

海外三山島。名馳五大州。聯盟敦睦好。杖劍壯遨遊。北上探遼水。

西來覽戍樓。奇踪希博望。道路騁驂騑。

攬轡游中外。豪情我亦同。身羈葱嶺北。夢繞大瀛東。贈別無長物。

相思似轉蓬。他年過海上。訪戴叩詩筒。

丁未四月南州少佐遠來伊江。出紀遊詩集囑題。勉成俚句。

即希吟正。介五氏、廣福

貫斗策槎振羽翰。扶桑曉日射吟鞍。邊風塞月供詩思。氣躡崑崙寶劍寒。